

湘綺樓日記

湘綺樓  
日記

丁卯十月殿揚署端

湘綺樓日記目錄

第一冊

同治八年己巳

第二冊

同治九年庚午

第三冊

同治十年辛未

第四冊

同治十一年壬申

第五冊

光緒元年乙亥

光緒二年丙子

第六冊

光緒三年丁丑

第七冊

光緒四年戊寅

第八冊

光緒五年己卯

第九冊

光緒六年庚辰

第十冊

光緒七年辛巳

第十一冊

光緒八年壬午

第十二册

光緒九年癸未

第十三册

光緒十年甲申

第十四册

光緒十三年丁亥

光緒十四年戊子

第十五册

光緒十五年己丑

第十六册

光緒十六年庚寅

光緒十七年辛卯

第十七册

光緒十八年壬辰

光緒十九年癸巳

第十八册

光緒二十年甲午

第十九册

光緒二十一年乙未

光緒二十二年丙申

第二十册

光緒二十四年戊戌

光緒二十五年己亥

第二十一册

光緒二十六年庚子

第二十二册

光緒二十七年辛丑

第二十三册

光緒二十八年壬寅

第二十四册 光緒二十九年癸卯

第二十五册 光緒三十年甲辰 光緒三十一年乙巳

第二十六册 光緒三十二年丙午

第二十七册 光緒三十三年丁未 光緒三十四年戊申

第二十八册 宣統元年己酉

第二十九册 宣統二年庚戌 宣統三年辛亥

第三十册 民國元年壬子 民國二年癸丑

第三十一册 民國三年甲寅

第三十二册 民國四年乙卯 民國五年丙辰

同治八年己巳

# 湘綺樓日記

初四日大雨讀漢書一卷得張東野先生書言清泉志列女事程商霖茂才書言刻桂陽志事均二十五日發天雨向暮無聊假寐遂至戌正起旋就寢

初五日晴午後渡蒸水至對屋王宅旋歸與兒女攤錢至亥罷覽漢書三卷未點班氏以充與蒯通同傳貶通大過江充自請使匈奴而以黠橫敗余請使英吉利得無過乎

初六日早晴日昃微雨早飯與十子論論語聖人所無可如何者有四一飽食終日二羣居終日三不曰如之何四法語不從巽語不繹因及周公遷殷頑民此數者皆無顯過可摘然聖人無如何足以困聖人者此類人也易笏山每作日記輒記過自責日日有過日日自責亦近頑矣

覽漢書二本未點心頗憚勞也論周仁溺袴事頗合訓義夜至戌寢

袴溺

今圓襦袴也  
古袴開襠

初七日寒雨讀賈誼傳誼王佐之才也直以庸臣見讒用其言而棄其身  
班氏以誼未爲不遇發憤之詞耳至以五餌之術爲疏謬矣又誼陳政  
事在見讒之後而今世論者譏其躁進尤爲巨謬也是日點漢書半卷

鬚髮

初八日雨水晴寒點漢書半卷梁孝王欲得容車之道自梁屬長樂宮以  
朝太后此英吉利火輪車道始見於史傳者也午間常儀菴來因肩輿  
出拜常文節墓歸留儀菴及其弟晴生從子漢桃午飯觀衡陽諸生揭  
告程春甫擅主志事其詞頗條鬯蕭園橋筆也申刻儀菴去戌正寢  
初九日晴暮雨點漢書半卷論董仲舒不及賈生其三對汗漫而無實徒  
儒而已午至石門觀上水船上瀨觸破一船晚歸放馬遇雨幾濕衣至

亥寢

初十日雨點漢書兩卷論戾太子真叛逆昌邑王非大無道趙充國屯田乃奪羌人業及諸葛鄧艾皆屯敵人田平世無屯法又考證訓義數處甲夜常元卿來送其家集二卷留宿東齋至亥罷寢

十一日陰晨至常氏塋觀李子葬處還書與儀安告之使往詰問盜葬之故點漢書一卷魏相表陰陽月令言高帝述書議天子春夏秋冬所服孝文帝時以二月施恩惠於天下賜孝弟力田及罷軍卒祠死事者頗非時節朝錯奏言其狀願選明經通知陰陽者四人各主一時以和陰陽李尋奏哀帝言朝廷忽於時月之令諸侍中尙書近臣宜皆令通知月令之意設羣下請事若陛下出令有謬於時者當知爭之以順時氣此漢人月令之政未廢之驗也王莽春夏斬人而論者知其將亡魯恭傳亦詳載恭疏以盛夏斷獄爲非行所當行亶不順時猶足致災况今



世以來月令久廢政事隨心日食頻數不亦宜乎魏丙賢相魏主安靜  
丙持寬大丙似勝也考工戈矛爲盧事漢少府有若盧令漢舊儀以爲  
主治庫兵卽此盧也晚觀非女作詞至子寢

十二日陰晴點漢書一卷王尊傳剪張禁酒趙放晉灼云作剪作酒之家  
食貨傳又云箭張湖三老公乘輿訟尊以爲長安大猾貢禹有田百三  
十畝而云無萬錢之產匡衡取穀千餘石廷尉奏直十金以上一金萬  
錢千錢十石百錢一石其大數也然衡多取田四百頃而止收穀千餘  
石則一頃不過數十石租賦輕矣班氏書少所刺譏而獨張禹傳微文  
可尋至謂其少好立卜相旁爲相聞天子疾輒露著筮其吉凶云云禹  
之鄙陋如見頃者胡文忠用邢星槎周笠西文咏吾世或譏爲皆賣卜  
測字之人如禹者其流耶夜擲骰至亥寢

十三日大晴出游山中還點漢書一卷

二十本

朱博傳復有闕字未補杜鄴

張敞外孫從舅吉學得其書吉子竦鄴外弟也又從鄴學鄴子林亦有雅材楊季官廬江太守至雄五世而傳一子故無他楊於蜀雄死而無子蜀楊氏絕矣後人以草書楊作揚遂以爲非楊姓又改左氏傳靈楊韓魏之字作揚以其獨一家也晉灼注漢書引張衡云雄爲楊食我之後反以雄自敍范中行氏偁楊侯爲誤因謂其譜牒疏謬後世儒者與人子孫爭言其父祖之事反云其子孫不知而爲駁正焉往往如此不足聽也雄之爲文艱深屈奇自喜耳猶在王褒之下而世以好奇竟久得名至今傳之朱熹尙以爲儒宗而攻擊焉何作僞之易讎也日側與妻共和勻藥泥昏時假寐至三鼓時起大月濯足

十四日雨點漢書一卷黃霸入錢賞官後免復入穀補吏此捐班捐復之祖也然稱循吏爲宰相捐班中大人貨殖傳歲萬息二千二分利自秦始戶租二百一畝收一鍾六斛四斗今畝收毛穀五石明矣古量一

斗爲斛今一石也漢畝大於今畝之驗百二十錢也今豐年穀或二百許錢亦相近矣蒼布千石今搭連布也淡乾魚爲鱒許員外孫有郭解午後鄉人儻燈來三十餘人迎布龍留飯而去鬻髮

十五日陰感寒至午後起鄉人儻凡三輩來其一輩侏儒獾雜未令入門晚祠羣神至子丑時月出其夜壯熱

十六日陰疾倦至申方起一食猶二盃點漢書半卷匈奴傳論和戰二端既謂夷狄獸心不可以理義法度論而又欲使曲在彼譬如與犬羊鬪而使犬羊負曲名欲其不我舐不可得也郭筠仙最好班氏此論以爲得制夷之要謬矣嚴本姓莊尤諂事王莽何知大計謬言三策棄內役外今猶踵之自漢以來爭以治夷爲患何其闇治體耶戊刻啗包子三枚月出復眠

十七日晴點漢書一卷王章上書攻王鳳而欲立定陶王逢帝一時終犯

其忌其死非不幸趙合德自殺不對狀後乃誣成其殺子非信史也王  
船山以耿育所奏爲非謬矣船山論史徒欲好人所惡惡人所好自詭  
特識而蔽於宋元明來鄙陋之學以爲中庸聖道適足爲時文中巨手  
而非著述之才矣夜亥歸寢

十八日晴點漢書二卷凡廿六卷皆點畢王莽捕翟義黨王孫慶使太醫  
尙方與巧屠共剝剝之量度五藏以竹筵導其脈知所終始云可以治  
病此英吉利剖視人之法所始見於史傳者也午間常耕臣來留東齋  
十九日陰陪耕臣出游至夏家彎見王蔭堂茂才葆澄之父也留酒出至  
塘彎見賀赤軒茂才及其弟留酒頃之赤軒父金灘歸留飯暮歸至亥  
寢王莽傳事怪譎至多尤奇者地皇元年閏月丙辰詔書赦天下並除  
民喪服是歲莽妻喪天下大服除之因除民父母喪服古今赦令所無

也

二十日陰王莽傳嚴尤陳茂敗昆陽下書至沛郡譙自稱漢將聞故漢鍾

武侯劉望聚聚汝南稱尊號

地皇四年更始元年八月

尤茂降之十餘日敗

十月更始奮威大將

軍劉信擊殺望於汝南

是日蒸煖至夜微雨旋止至戌寢功兒讀士喪畢

二十一日陰曉雨午晴耕岑去讀後漢書二卷班固為漢報使匈奴

至私渠海

未入其國

宜有文采賦詠而今無聞焉殤帝以十二月立方生百餘日明年

八月崩計正滿歲而史云二歲則古不作周睟也鄧后策命安帝初稱

侯末乃稱皇帝册帝文始見於此可以為式湖南僻遠而東漢官位最

盛臨湘祝良字邵卿劉壽字伯長當順帝時同時達官良以選為九真

大守史為數語記其事壽由光祿勳為司徒五年乃罷

長沙書舊傳壽嘗乘通轡車見隋書

禮儀志引

遂無聞焉靈帝初長沙劉囂為司空囂字重寧蓋壽子姓在位年

餘罷前書令昭后受經後鄧后臨朝亦詔劉珍等五十餘人校傳記奏

御身從曹大家受經書鄧后作偽以終其身而竊賢名范史傳之有微

旨矣是日兩兒倍書三篇計十子鈔書五日得十五葉比去年日少一葉也夜又讀漢書二卷鈔莊子一葉

二十二日雨寒讀漢書二卷隗囂儒生負貴欲傾擾於兵間然名望久著漢終不能禽也子元請丸泥封關而降爲縣令遷國相坐死何昔今之殊勢乎世祖亦儒生標置一失於邯鄲杜威再失於彭寵又譎謝躬而乘其敗故石勒輕之開國御雄宜有大略寇榮亡命上書其詞切直佳文也桓帝庸主何能相容是日十子鈔書四葉次女桂窠入學初字二十三孝興讀禮記六十字鈔莊子一葉吉來讀禮經鄉射篇不熟遂至一日夜慶來地官亦生非讀長門賦二百字至成寢

二十三日驚蟄申雨雷讀漢書二卷岑彭吳漢攻荆門留夷陵裝露橈船蓋今三板船也清野之說始於陳俊俊攻五校賊於漁陽將輕騎出賊前掠民放散在野者民乃堅守賊無所得此身自爲賊耳竇憲弟瓌徙

封羅侯梁棠兄弟過長沙迫令自殺馬援始從隗恂爲質而留上林中  
不得試用於後屢請自效乃卒以進壺頭被讒言帝之輕援以其二心  
一耳朱勃上書獨明其寃言詞伉直深厚其所學殆十倍於援而史稱馬  
况言勃小器援貴乃卑侮之嗟夫援一熱中好事之人烏能與勃比哉  
是日諸子工課粗畢兩兒書不熟夜鈔莊子一葉大雷雨戌初止亥初  
乃寢

二十四日晴寒讀漢書三卷杜詩請罷郡以讓功臣知今事平而奪軍功  
督撫者不可以勸光武之起諸將皆盜賊餘習以劫掠爲事帝非惟不  
禁且頗縱之不讀桓譚疏不知其弊也譚以賢薦而用新聲娛主故帝  
輕之不用其言然可謂直臣矣彈琴小節無累倜儻之士馮衍好亂阻  
兵勢窮乃降亦廢棄終身比譚爲幸矣是日兩兒課稍早畢非女作水  
仙詞作書與水師廖副將請其買韞鈔莊子一葉

二十五日陰晴讀漢書二卷胡伯始引證大體甚有相度以中庸見譏亦爲苛矣若容身保位之臣未能有其通識也張敏徐防亦無顯過范史以刺鄧后錄爲庸臣以勸風節孔子所謂爲法受惡者歟袁安正議侃侃累折竇氏可謂大臣矣張酺孟侯韓稜師並觸權貴然卒申其志後歷公卿東漢節義斯乃效矣彼鈎黨朋狂何足重乎西漢論政學者皆對策上書足以裨治東漢王符崔寔仲長統諸儒動作數萬言以誘民俗則著書自任其文必繇范史載之未爲通識矣申屠子龍外黃人爲漆工七辟不就挂書樹上初不顧盼先見黨禍絕迹梁碭因樹爲屋自同傭人閩運無斯人確然之操而好立名譽讀其傳庶幾高山仰止之思云林宗康成迹易幾耳是日兩兒課不如程王蔭堂來少坐去夜眠至旦乃復寢非女始鈔公羊成公

二十六日陰夜雨午間出放馬僕言客至歸則常吉人在焉竟日談言道



光中監司之貴州縣傾動所以召亂也然州縣今輕大吏亦非治徵晚與吉人談忽發寒噤歸寢頃之愈諸兒罷學一日

二十七日陰午初吉人去讀漢書四卷馬融以飢寒附鄧氏得官仍申仇直及忤鄧忤梁再廢幾死然後改節以終富貴女樂紗帳年至耄期天之勸惡沮善如此邪左伯豪限年以舉孝廉至陋之議也然陳蕃李膺陳球均以此選永熹蒙法察選清平又奏十二歲通經者謝廉趙建爲童子郎而博士向學觀雄之舉措分學與政爲二以收一時之效耳然限年舉人不足以示天下又用巧辭以詰徐淑雄爲失議矣陳寔稱賢久矣觀其受污殺人而託召揚吏名人姓外署鬪黨而事君以諂獨弔張讓身爲媚首矯性欺人誠無取焉聖人惡鄉原誅聞人其在寔乎不然何以致三公之屢讓三萬人之赴弔耶李固治郡頗聞方略前後所陳亦見政體然立帝遇弒不能推問便可知難而止何顏復爲三公與梁